



苑詩類選卷之七

明監察御史包節輯按察司知事前給事中王交校

應制部三

宮 臺 殿 樓 亭
園 宅 池 公 主 林 亭

○過舊宮

周明帝

玉燭調秋氣金輿歷舊宮還如過白水更似入新豐秋
潭清晚菊寒井落踈桐舉杯延故老今聞歌大風

爰因巡省途次舊宮

唐玄宗

三千初擊浪九萬欲搏空天地猶驚否陰陽始遇蒙存
身期歷試佐貳佇昭融多謝時康理良慙寶劍功長懷
問鼎氣夙負拔山雄不學劉琨舞先歌漢祖風英髦既

包括豪傑自牢籠人事一朝異謳歌四海同如何昔朱
邱今此作離宮鴈沼澄瀾翠猿巖落照紅小山餘桂馥
長坂舊蘭蓀即是淹留處乘歡樂未窮

奉和前聖製

張說

葱鬱興王郡殷憂啓聖圖周成會西土漢武幸南都歲
卜鑾輿邁農祠鴈政敷武威稜外域文教靡中區警蹕
千戈捧朝宗萬玉趨舊藩人事革新國禮容殊璧有真
龍畫庭餘鳴鳳梧叢觴祝堯壽合鼎獻湯厨陽樂寒初
變春恩蟄更蘇三者頒命服五稔復田輸君賦大風起
人歌湛露濡從臣觀玉葉方願紀靈符

又

蘇頲

潞國臨淄邸天王別駕輿出潛離隱際小徃大來初東
陸行春興南陽即舊居約川星罕駐扶道日旂舒雲覆
連行在風迴助掃除太行城邑望臯落土田疏昔試邦
興后今過俗後予示威寧校獵崇讓不陳漁府吏趨宸
宸鄉耆捧帝車帳傾三飲處閑整六飛餘盛業銘汾鼎
昌期應洛書願陪歌賦未留比蜀相如

奉和春日幸望春宮應制 岑羲

和風助律應韶年清蹕乘高入望僊花笑鶯歌迎帝輦
雲披日霽俯皇川南山近壓僊樓上北斗平臨魏闕前

一奉恩榮同鎬宴空知率爾聽薰絃

又

沈佺期

芳郊綠樹散春晴
複道離宮煙霧生
楊柳千條花欲綻
蒲萄百丈蔓初榮
林香酒氣元相入
鳥嘯歌聲各自成
定是風光牽宿醉
來晨復得幸昆明

又

李適

玉輦金輿天上來
花園四望錦屏開
輕絲半拂朱門柳
細纈全披畫閣梅
舞蝶飛行飄御席
歌鶯度曲繞僊杯
聖詞今日光輝滿
漢主秋風莫道才

又

李义一作李义府

東城結宇瞰千尋
北闕迴輿具四臨
麗日祥煙承罩暈
輕萸弱草藉衣簪
秦商重沓雲巖近
河渭縈紆霧壑深
謬接鴛鸞陪賞樂
還欣魚鳥遂飛沉

又

薛稷

九春風景足林泉
四面雲霞敞御筵
花鏤黃山繡作苑
草圖玄灞錦爲川
飛觴競醉心迴日
走馬爭看眼着鞭
喜奉僊遊歸路遠
直論行樂不言旋

又

鄭愔

晨蹕凌高轉翠旌
春樓望遠背珠城
忽排花上游天苑
却坐雲邊看帝京
百草香心初習蝶
千林嫩葉始藏鶯

奉同葵藿傾陽早願比盤根應帝榮

又

崔湜

淡蕩春光滿曉空
逍遙御輦入離宮
山河眺望雲天外
臺榭參差煙霧中
庭際花飛錦繡合
枝間鳥轉管絃同
即此歡娛齊鎬宴
唯應率舞樂薰風

又

劉憲

暮春春色最便妍
苑裡花開列御筵
南山積翠臨城起
澹水浮光共幕連
鸞戲嫩葉歌相喚
蝶礙芳蕤舞不前
歡娛節物今如此
願奉宸遊億萬年

又

常元旦

九重樓閣半山阿
四望韶陽春未賒
侍蹕妍歌臨灞浹
留觴艷舞出京華
危萍競捧中衢日
戲馬爭銜上苑花
景色歡娛長若此
承恩不醉不還家

又

馬懷素

綵毼瑤輿俯碧潯
行春御氣發皇心
搖風細柳縈馳道
映日春花出禁林
通野園亭開帟幕
連堤草樹狎衣簪
謬參西掖霑堯酒
願沐南薰解舜琴

又

蘇頲

東望望春春可憐
更逢晴日柳含煙
宮中下見南山盡
城上平臨北斗懸
細草偏承迴輦處
春花故落舞觴前

宸遊對此歡無極鳥哢歌聲雜管絃

又

張說

別館芳菲上苑東飛花淡蕩御筵紅城臨渭水天河近
一作關對南山雲霧通繞殿流鶯凡幾樹當蹊亂蝶許
多叢春園既醉心和樂共識皇恩造化同

又

崔日用

東郊芳物正薰馨素澹鳧鷖戲綠汀鳳閣斜通平樂觀
龍旂直逼望春亭光風搖動蘭英紫淑氣依遲柳色青
渭浦明晨脩禊事群公傾賀水心銘

又

武平一

鑾輅青旂下帝臺東郊上苑望春來黃鸝未解林間囀
紅蕖先從殿裏開畫閣條風初變柳銀塘曲水半含苔
忻逢睿藻光韶律更促霞觴畏景催

奉和幸長安故城未央宮應制

李嶠

舊宮賢相築新苑聖君來運改城隍變年深棟宇摧後
池無復水前殿久成灰莫辯祈風觀空傳承露杯宸心
千載合睿律九韶開今日聯章處猶疑上栢臺

又

宋之問

漢王未息戰蕭相乃營宮壯麗一朝盡威靈千載空皇

明帳前跡置酒宴群公寒輕彩仗外春發幔城中樂思
迴斜日歌詞繼大風今朝天子貴不假叔孫通

又

李义

鳳輦乘春陌龍山訪古臺北宮纔盡處南斗獨昭回肆
覽飛宸札稱觴引御杯已觀蓬海變誰厭栢梁災代挹
孫通禮朝稱賈誼才忝儕文雅地先後各時來

又

趙彦昭

夙駕移天蹕憑軒覽漢都寒煙收紫禁春色繞黃圖舊
史遺陳跡前王失霸符山河寸土盡宮觀尺椽無崇高
唯在德壯麗豈爲謨茨室留皇鑒薰歌盛有虞

又

劉憲

漢宮千祀外軒駕一來遊夷蕩長如此威靈不復留憑
高睿賞發懷古聖情周寒向南山歛春過北渭浮土功
昔云盛人英今所求幸聽薰風曲方知霸道羞

暇日與兄弟同遊興慶宮作

唐玄宗

代邸青門右離宮紫陌垂庭如過沛日水若渡江時綺
觀連雞岫朱樓接鴈池從來敦棣萼今此茂荆枝萬葉
傳餘慶千年志不移憑軒聊矚目輕輦共追隨務本方
崇訓相輝保羽儀時康俗易漸德薄政難施鼓吹迎飛

蓋絃歌送壽卮所希單率土孝第一同規

奉和前聖製

張說

漢武橫汾日周王宴鎬年何如造區夏復此睦親賢巢
鳳新成閣飛龍舊躍泉棣花歌尚在桐葉戲仍傳禁藥
氛埃隔樓臺景物連聖慈良有裕王道固無偏問俗群
黎阜觀風五教宣獻圖開益地張樂奏鈞天侍酌衢鐘
滿詢芻諫鼓懸永言彤友愛萬古共周旋

奉和御製從蓬萊宮向興慶閣道中之作

王維

渭水自滌秦甸曲黃山舊遶漢宮斜鑿輿迥出千門柳

閣道迴看上苑花雲裏帝城雙鳳闕雨中春樹萬人家
為乘陽氣行時令不是宸遊玩物華

又

李愔

別館春還淑氣催三宮路轉鳳凰臺雲飛北闕輕陰散
雨歇南山積翠來御柳遙隨天仗發林花不待曉風開
已知聖澤深無恨更喜年芳入睿才

以上宮

○登三臺言志

唐太宗

未央初壯漢阿房昔侈秦在危猶騁麗居奢遂役人豈
如家四海日宇罄朝倫扇天裁戶舊砌地剪基新引月
擎宵桂飄雲逼曙鱗露除光泫玉霜闕映雕銀舞接花

梁燕歌迎鳥路塵鏡池波太液莊苑麗宜春作異甘泉
日停非路寢辰念勞慙逸已居曠反勞神所欣成大厦
宏材佇渭濱

奉和前聖製

許敬宗

中天表雲榭戴極聳崑樓聖作規玄造軒阿復聿脩高
門符令節形勝摠神州企翼搏禽萃飛鳧燕雀遊綴星
羅百拱緣漢轉三休旦雲生玉鳥初月上銀鈎妙管含
秦鳳僊姿儷斗牛永言防處逸粹藻發嘉猷荷生無以
謝盡瘁竟何酬

春臺望

唐玄宗

暇景屬三春高臺聊四望目極千里際山川一何壯太
華見重巖終南分疊嶂郊原紛綺錯參差多異狀佳氣
滿通溝遲步入綺樓初鷺一一鳴紅樹歸鴈遲遲出綠
洲太液池中下黃鶴昆明水上映牽牛聞道漢家全盛
日別館離宮趣非一甘泉迢遞亘明光五柞連延接未
央周廬徼道縱橫轉飛閣迴軒左右長須念作勞居者
逸勿言我后焉能恤爲想雄豪壯栢梁何如陋儉卑茅
室陽烏黯黯向山沉夕鳥喧喧入上林薄暮嘗餘迴步
輦還念中人罷百金

奉和前聖製

蘇頌

壯麗天之府神明王者宅大君乘飛龍登披復懷昔圓
闕朱光焰橫山翠微積河汧流作表縣聚開成陌即舊
在皇家惟新具物華雲連陌上居恒屬日更時中望不
斜三月滄池搖積水萬年青樹綴新花暴嬴國此嘗圖
霸業後仁先以詐東破諸侯西入秦咸陽北坂南渭
津詩書焚藝散學士高閣奢踰嬌美人事往覆輶輕遠
喻春還鞍蹕憑高賦我觀愛力深惟省越厭陳方向足
務清吹遥遥發帝臺宸文耿耿照天迴伯夷位事愚臣
忝喜奏聲成鳳鳥來

又

賀知章

青陽布王道玄覽陶真性欣若天下春高逾域中聖神
臯類觀賞帝里如懸鏡繚繞八川浮岩堯雙闕映曉色
徧昭陽晴雲卷豫章華滋的爍丹青樹顯氣氤氳金玉
堂上有靈蛇下廊時還徵瑞寶入陳倉自昔秦奢漢窮
武後庭萬餘宮百數旗迴五丈殿千門連綿南陞出西
垣廣畫螭蟻誇窈窕羅生玳瑁象崑崙迴睠天情興隱
恤古來土木良非一荆歸章華趙叢臺何如堯階將禹
室層欄窳窳下龍輿清管逶迤半綺䟽一聽南風引鸞
舞長謠止極仰鶉居

又

許景先

睿德在青陽高居視中縣秦城連鳳闕漢寢疏龍殿文
物照光輝郊畿鬱葱藉千門望成錦八水明如練複道
曉光披宸居出禁移瑞氣朝浮五雲閣祥光夜吐萬年
枝蘭葉負龜初薦祉桐花集鳳更來儀秦漢生人凋力
役阿房甘泉構雲碧汾祠雍時望通天玉堂宣室坐長
年鼓鍾西接咸陽觀苑囿南通鄆社田明主卑宮誠前
失輔德欽賢政惟一昆蟲不夭在春蒐稼穡常艱重農
術邦家已荷聖謨新猶聞儉陋惜中人預奉北辰垂七
曜長歌東武抃千春以上

○晚宴文思殿

陳後主

晚日落餘暉宵園翠蓋飛荷影侵池浪雲色入山扉螢
光息復起暗鳥去翻歸樂極未言醉杯深猶更稀

奉和冬至日乾陽殿受朝恩詔

牛弘

恭已臨萬寓宸居馭八埏作貢菁茅集來朝圭幣連司
儀三揖盛掌禮九賓虔重欄映如壁複道遶非煙

宴瑤泉殿

江總

水亭通朽詣石路接堂皇野花不識采旅竹本無行雀
驚疑欲曙蟬噪似含涼何言金殿側亟奉瑤池觴

臨芳殿侍宴

前人

鍾箭自徘徊堂皇薦羽杯橋平疑水落石迥見山開林
前暝色靜花處近香來西崑傷撫夕北閣濫游陪

儀鸞殿早秋

唐太宗

寒驚薊門葉秋發小山枝松陰背日轉竹影避風移提
壺菊花岸高興芙蓉池欲知涼氣早巢空燕不窺

奉和前聖製應制

許敬宗

睿想追嘉豫臨軒御早秋斜暉麗粉壁清吹肅朱樓高
殿凝陰滿雕窓艷曲流小臣參廣宴大造諒難酬

以上殿

○初春登樓即目觀作述懷

唐太宗

憑軒俯蘭閣眺矚散靈襟綺峯含翠霧照日葢紅林鏤

丹霞錦岫殘素雪班岑拂浪低垂柳嬌花鳥續吟連薨
豈一拱衆幹如千尋明非獨材力終藉棟梁深彌懷矜
樂志更懼戒盈心愧制勞居逸方龜十產金

奉和前聖製應制

許敬宗

旭旦臨重壁天眷極中京春暉發芳甸佳氣滿層城去
鳥隨看沒來雲逐望生歌裏祥煙颺琴上凱風清文波
浮鏤檻搗景煥雕楹璇璣體寬政隆棟象端衡創規雖
有作凝拱遂無營沐息空改鬢將何謝厦成

春日登陝州城樓俯眺原野迴丹碧綴烟霞

密翠班紅芳菲花柳即目川岫聊以命篇

唐太宗

碧原開霧隱綺嶺峻霞城烟峯高下翠日浪淺深明班
紅裝葢樹園青壓溜荆跡巖勞傳想窺野訪莘情巨川
何以濟舟楫佇時英

奉和前聖製應制

許敬宗

挹河徵綠宇御溝映朱宮辰旂翻麗景星罕曳雕虹學
頻齊柳嫩妍笑發春藜錦鱗文碧浪繡羽絢青空睿念
三階靜遐想二南風

首夏花萼樓觀群臣宴寧王山亭迴樓下又
申之以賞樂賦詩

唐玄宗

今年通閏月入夏展春暉樓上風光晚城隅宴賞歸九
歌揚政要六舞散朝衣天喜時相合人和事不違禮中
推意厚樂處感心微別賞陽臺樂前旬暮雨飛

奉和前聖製應制

張說

萬心翹樂宴三舍緩昌時山接夏雲險臺留春日遲節
移芳未歇興隔賞仍追醉後傳嘉惠樓前舞聖慈皇恩
與時合天意若人期故發前旬雨新垂湛露詩

奉和御製登鴛鴦樓即目應制

孫逖

玉輦下離宮瓊樓上半空方巡五年狩更闢四門聰井

邑觀秦野山河念禹功停鑾留睿作軒檻起南風樓以上

○望春亭侍宴應制

杜審言

帝出明光殿天臨太液池堯樽隨步輦舜樂繞行麾萬
壽禎祥獻三春景物滋小臣同酌海歌頌荅無爲

宿羽亭侍宴應制

前人

步輦千門出離宮二月開風光新柳報宴賞落花催碧
水搖雲閣青山繞吹臺聖情留晚興歌管送餘盃

幸梨園亭觀打球應制

沈佺期

今春芳苑遊接武上瓊樓宛轉縈香騎飄飄拂畫毬俯
身迎未落迴轡逐旁流祗爲看花鳥時時悞失籌

又

武平一

令節重遨遊分鑣戲綵毬驂驪迴上苑躡蹠繞通溝影
就紅塵沒光隨赭汗流賞闌清景暮歌舞樂時休

夏日僊萼亭應制

宋之問

高嶺逼星河乘輿此日過野舍時雨潤山雜夏雲多睿
藻光巖穴宸襟洽薜蘿悠然小天下歸路滿笙歌

奉和幸神臯亭應制

前人

清蹕喧黃道乘輿降紫宸霜戈凝曉日雲管發陽春臺
古全疑漢林餘半識秦宴酣詩布澤節改令行仁昔恃
山河險今依道德淳多慙獻嘉頌空累屬車塵

侍宴荷亭

張說

迴鑿青嶽觀，帳殿紫煙峯。僊路迎三島，雲衢駐六龍。園林看故塔，壇墀識餘封。山外聞簫管，還如天上逢。

同望幸新亭賜錢公宴

李愷

感夢通玄化，覃恩降紫宸。賜錢開漢府，分帛醉堯人。地隔朝宗慶，亭臨北洛新。行看廣雲雨，二月次東巡。以上亭

○同二相已下群臣宴樂遊園

唐玄宗

巽日巖廊暇，需雲宴樂初。萬方朝玉帛，千品會簪裾。地入南山近，城分北斗餘。池塘垂柳密，原野雜花疎。帝幕

看逾暗，歌鍾聽自虛。興闌歸騎轉，還奏弼違書。

奉和前聖製應制

張說

漢苑佳遊地，軒庭近侍臣。共持榮幸日，來賞艷陽春。饌玉頒王篚，撻金下帝鈞。池臺草色遍，宮觀柳條新。花綬先連榻，朱顏暢飲醇。聖朝多樂事，天意每隨人。

又

趙冬曦

爽塏三秦地，芳華二月初。酺陳真璧罷，宴似合錢賒。柳翠垂堪結，桃紅卷欲舒。從容會鴛鴦，延蔓戲龍魚。喜氣通雲物，歡聲浹里閭。聖恩將厚意，請述記言書。

又

蘇頲

樂遊光地選醕飲慶天從座密千官盛場開百戲容綠
滕際山近緹幕倚雲重高下花齊發周迴柳遍濃奪睛
紛劔履喧聽雜歌鍾日晚銜恩散堯人併可封

又

宋璟

侍飲終醕會承恩續聖遊戴天唯慶幸選地即殊尤北
向低一作祇雙闕南臨賞一丘曲江新溜暖上苑雜花稠
疊疊韶絃屢戔戔賁帛周醉歸填畛陌榮耀接軒裘

又

崔沔

五日醕纔畢千年樂未央復承天所錫終宴國之陽地
勝春逾好息深樂更張落花飛廣座垂柳拂行觴庶尹

陪三史諸侯具萬方酒酣同抃躍歌舞詠時康

又

王翰

未極人心暢何知帝道明仍嫌醕宴促復寵樂遊行陸
海披瓊巖天河望斗城四關青靄合數處白雲生鼎鍊
調元氣歌鍾溢雅聲空慙堯舜日至德杳難名

又

胡皓

五醕終宴集三錫又歡娛仙阜崇高異神州覽眺殊南
山臨皓雪止闕對明珠宰座鴛鴻滿昌庭駟馬趨綺羅
含草樹絲竹吐郊衢銜盃不能罷歌舞恣唐虞

又

崔尚

春日照長安皇恩寵庶官
合錢承罷宴賜帛復追歡
供帳憑高列城池入迥寬
花催相國飲鳥和樂人彈
止闕雲中見南山樹杪看
樂遊宜締賞舞詠惜將闌

又

張九齡

寶筵延錫命供帳序群公
形勝宜春接威儀建禮同
晞陽人似露解醞物從風
朝慶千齡始年華二月中
輝光遍草木和氣發絲桐
歲歲長無事寧知樂九功

以上

○過舊宅二首

唐太宗

新豐停翠輦譙邑駐鳴笳
園荒一徑斷臺古半階斜
前池消舊水昔樹發今花
一朝辭此地四海遂成家

其二

金輿巡白水玉輦駐新豐
紐落藤披架花殘菊破叢
葉鋪荒草蔓流竭半池空
紉佩蘭凋逕舒珪葉剪桐
昔地一藩內今宅九圍中
架海波澄鏡謠歌器反農
八表文同軌無勞歌大風

奉和前聖製

許敬宗

飛雲臨紫極出震表青光
自爾家寰海今茲返帝鄉
情深感代國樂甚讌譙方
白水浮佳氣黃星聚太常
岐鳳鳴層閣艷雀賀雕梁
桂山猶摠翠蘅薄尚流芳
攀鱗有遺皓沐德抃稱觴

又

上官儀

石宮清晚夏璇輿御早秋神麾颺珠兩僊吹響飛流沛
水祥雲泛宛郊瑞氣浮大風迎漢筑叢烟入舜球翠梧
臨鳳邨滋蘭帶鶴舟偃伯歌玄化扈蹕頌王遊遺簪謬
詔獎珥筆荷恩休

奉和幸常嗣立山莊應制 李嶠

南洛師臣契東巖王佐居幽情遺紱冕宸眷矚樵漁制
下峒山蹕息迴灞水輿松門駐旌阜薛幄引簪裾石磴
平黃陸烟樓半紫虛雲霞僊路近琴酒俗塵踈喬木千
齡外懸泉百丈餘崖深經鍊藥穴古舊箴書樹宿搏風
鳥池潛縱壑魚寧知天子貴尚憶武侯廬

又

沈佺期

昂臣休澣隙方外結遐心別業青霞境孤潭碧樹林每
持東墅策遙弄北溪琴帝幸行時豫台園賞歲陰移鑾
明月沼張組白雲岑御陌瑤觥落僊壇竹徑深三光懸
聖藻五等冠朝簪自媿承恩盛咸言獨在今

又

宋之問

樞掖調梅暇林園藝槿初入朝榮劍履退食偶琴書地
隱東巖室天迴北斗車旌門臨窳窳輦道屬扶踈雲罕
明丹壑霜笳徹紫虛水疑投石處碨似釣璜餘帝澤頌

庖酒人歡頌里間一承黃竹詠長奉白茅居

又

李义

台階好赤松別業對青峯茅室承三顧花原接九重
龍旗縈秀木鳳輦拂踈筇逕狹千官擁溪長萬騎容水堂
開禹膳山閣獻堯鍾皇鑒清居遠天文睿獎濃巖泉他
日夢漁釣往年逢共榮丞相府偏降逸人封

又

崔湜

丞相登前府尚書啓舊林式閭明主意榮族聖嬪心川
狹旌門抵巖高黼帳臨間牕憑柳暗小徑入松深雲卷
千峯色泉和萬籟吟蘭迎天女佩竹礙侍臣簪宸翰三

光燭朝榮四海欽還嗟絕機叟白首漢川陰

又

趙彦昭

賢族唯題里儒門但署鄉如何表巖洞宸翰發輝光地
在茲山曲家隣邵水陽六龍駐旌罕四牡耀旂常北斗
臨台座東山入廟堂天高羽翼近主聖股肱良野竹池
亭氣村花澗谷香縱然懷豹隱空愧躡鴛行

又

劉憲

東山有謝安在道降鳴鑾緹騎紛初日霓旌度曉寒雲
躡巖間下虹橋澗底盤幽棲俄似屆聖矚宛餘歡崖懸
飛溜直岸轉綠潭寬桂華堯酒泛松響舜琴彈明主恩

斯極賢臣節更殫不才叨侍從詠德以濡翰

又

蘇頌

擬金寒墅霽步玉曉山幽帝幄期松子匡廬訪葛侯百
工徵徃夢七聖扈來遊斗柄乘時轉台階捧日留樹重
巖籟合泉迸水光浮石徑喧朝履璜溪擁釣舟思如犯
星夜歡擬濟河秋不學堯年隱空令傲許由

又

張說

寒灰飛玉瑄湯井駐金輿既得方明相還尋大隗居懸
泉珠貫下列嶂錦屏舒騎遠林逾密笳繁谷自虛門旗
槩複磴殿幕褰通渠舞鳳隨公主雕龍起婕妤地幽天

賞洽酒樂御筵初菲才叨侍從連藻媿應徐

又

武平一

三光迴斗極萬騎肅鈞陳地若遊汾水畋疑歷渭濱圓
塘水寫鏡遙樹露成春絃奏魚聽曲機忘鳥狎人築巖
思感夢磻石想垂綸落景搖紅壁曾陰結翠筠素風紛
可尚玄澤藹無垠薄暮清笳動天文煥紫宸

上又製七言絕句侍臣皆和

李嶠

萬騎千官擁帝車八龍三馬訪僊家鳳凰原上窺青壁
鴛鴦杯中弄紫霞

又

東山朝日翠屏開
北闕晴空綵仗來
喜遇天文七曜動
少微今夜入三台

沈佺期

又

曲榭迴廊繞澗幽
飛泉噴水溢池流
祗因感發明王夢
遂得邀迎聖主遊

李乂

又

竹逕桃源本出塵
松軒茅棟別驚新
御蹕何須林下駐
山公不是俗中人

崔湜

又

趙彥昭

廊廟心存巖壑中
鑿輿矚在灞城東
逍遙自有蒙莊子
漢主徒言河上公

又

劉憲

非吏非隱晉尚書
一丘一壑降乘輿
天藻緣情兩曜合
山巵獻壽萬年餘

又

蘇頲

樹色參差隱翠微
泉流百丈向空飛
傳聞此處投竿住
遂使茲辰扈蹕歸

又

武平一

鳴鑾奕奕下重樓
羽蓋迢迢向一丘
漢日唯聞白衣寵

唐年更覩赤松遊

奉和幸禮部尚書竇希玠宅應制

沈佺期

北闕垂旒殿南宮聽履迴天臨祥鳳轉息向濯龍開蘭
氣薰僊帳榴花引御杯水從金穴吐雲是玉衣來池影
搖歌席林香散舞臺不知行漏晚清蹕尚徘徊

又

李乂

家住千門側亭臨二水旁貴遊開北第宸眷幸西鄉
曳履迎中谷鳴絲出後堂浦疑觀萬象峯似駐三光草
向瓊筵樂花承繡宸香聖情思舊里留飲賦雕章

又

劉憲

北斗樞機任西京肺腑親疇昔王門下今茲制幸辰
恩光山水被聖作管絃新遠座薰紅藥當軒暗綠筠
摘荷纔早夏聽鳥尚餘春行漏今徒晚風煙起觀津

又

蘇頲

尚書列侯第外戚近臣家飛棟臨青綺迴輿轉翠華
日交當戶樹泉漾滿池花圓頂圖嵩石弓流擁魏沙
豫遊今聽履侍從昔鳴笳自有天文降無勞訪海查

幸上官昭容院山亭獻詩四首

鄭愔

地岫樓居遠天台關路賒何如遊帝宅即此對僊家座
拂金壺電池搖玉酒霞無云秦漢隔別訪武陵花

其二

堯茨姑射近漢苑建章連十五莫知月三千桃記年鑾
歌隨鳳吹鶴舞向鴟絃更覓瓊妃伴來過玉醴泉

其三

宮掖賢才重山林高士難不言辭輦地更有結廬歡池
棟清溫燠巖窓起沍寒幽庭有僊桂聖主萬春看

其四

槎流天上轉茅宇禁中開河鵲填橋至山熊避檻來庭

花採棣萼巖石步莓苔願奉皇圖泰長聞錦翰裁

過大哥宅得歌字

唐玄宗

魯衛情先重親賢愛轉多冕旒豐暇日乘景暫經過戚
里申高宴平臺奏雅歌復尋爲善樂方驗得山河

奉和前聖製應制

張說

進酒忘憂觀簫韶喜降臨帝堯敦族禮王季友兄心竹
苑龍鳴笛梧宮鳳繞林大風將小雅一字重千金

以上宅

○同玉真公主過大哥山池 唐玄宗

地有招賢處人傳樂善名鷺池尋九達龍岫對層城桂
月先秋冷蘋風向晚清鳳樓遙可見髮髻玉簫聲

奉和前聖製題石壁應制 張說

綠竹初成苑丹砂欲化金乘龍與驂鳳歌吹滿山林爽
氣凝波迥寒光映浦深忘憂題此觀為樂賞同心

奉和晦日幸昆明池應制 沈佺期

法駕乘春轉神池象漢迴雙星遺舊石孤月隱殘灰戰
鷁逢時去息魚望幸來岸花緹騎繞堤柳幔城開思逸
橫汾唱歡流宴鎬杯微臣彫朽質羞覩豫章材

又

宋之問

春豫靈池會滄波帳殿開舟凌石鯨度槎拂斗牛迴節
晦莫全落春遲柳暗催象溟看浴景燒劫辨沉灰鎬飲

周文樂汾歌漢武材不愁明月盡自有夜珠來

又

李义

玉輅尋春賞金隄重晦遊川通黑水浸地派紫泉流晃
朗扶桑出絲聯樹杞周鳥疑堙海處人似隔河秋劫盡
灰猶識年移石故留汀洲歸棹晚簫鼓雜汾謳

又

蘇頲

炎曆事邊陲昆明始鑿池豫遊光後聖征戰罷前規霽
色清珍宇年華入錦陂御杯蘭薦葉僊仗柳交枝二石
分河瀉雙珠代月移微臣比翔泳息廣自無涯

昆明池侍宴應制

沈佺期

武帝伐昆明穿池習五兵水同河漢在館有豫章名我
后光天德垂衣文教成黷兵非帝念勞物豈皇情春仗
過鯨沼雲旗出鳳城靈魚銜寶躍僊女廢機迎柳拂旌
門暗蘭依帳殿生還如流水曲日晚棹歌聲

恩勅尚書省寮宴昆明池應制同用堯字

張嘉貞

靈沼初開漢神池舊浴堯昔人徒習武明代此聞韶地
脉山川勝天息雨露饒時光牽利舸春淑覆柔條芳醞
醒千日華錢落九霄幸承歡資重不覺醉歸遙

又

蘇頲

露渥灑雲霄天官次斗杓昆明四十里空水極晴朝鴈
似銜紅葉鯨疑噴海潮翠山來徹底白日去迴標泳廣
漁叔溢浮深妓舫搖飽息皆醉止合舞共歌堯

興慶池侍宴應制

沈佺期

碧水澄潭映遠空紫雲香輦御微風漢家城闕疑天上
秦地山川似鏡中向浦迴舟萍已綠分林蔽殿槿初紅
古來徒羨橫汾賞今日宸遊聖藻雄

又

蘇瓌

金闕平明宿霧收瑤池式燕俯清流瑞鳳飛來隨帝輦
祥魚出戲躍王舟帷齊綠樹當筵密蓋轉細荷接岸浮

如臨竊比微臣懼若濟叨陪聖主遊

又

李適

拂露金輿丹旆轉凌晨黼帳碧池開
南山倒影從雲落北澗搖光駕一作寫浪迴急舸爭標排
荇渡轉帆截浦觸荷來橫汾宴鎬歡無極
歌舞年年聖壽杯

又

李又

神池汎濫水盈科僊蹕紆餘步輦過縱
掉洄沿萍溜合開軒眺賞麥風和潭魚在
藻欣遊泳谷鳥含櫻入賦歌寄謝乘槎溟
海客匝頭來此問天河

又

劉憲

蒼龍闕下天泉池軒駕來遊簫管吹綠隄
夏篠繁不散冒水新荷卷復披帳殿疑從
畫裏出樓船直在鏡中移自然東海神僊
處何用西昆轍迹疲

又

徐彥伯

夾道傳呼翊翠虬天迴地轉御芳洲青潭
曉靄籠僊蹕紅嶼晴花隔綵旒香溢金環
盈廣座聲搖效舸匝中流群臣相慶嘉魚
樂共晒橫汾歌吹秋

又

帝元旦

滄洲漭沆帝城邊殊勝昆明鑿漢年夾岸
旌旗疏輦道中流簫鼓振樓船雲峯四起
迎宸幄水樹千重入御筵

宴樂已深魚藻詠承恩更欲奏甘泉

又

馬懷素

積水逶迤繞貝城含虛皎鏡有餘清
園雲曲榭連緹幕映日中塘勝綵旌
賞洽猶聞簫管沸歡留更睹木蘭輕
無勞海上尋僊客即有蓬萊在帝京

又

蘇頲

降鶴池前迴步輦棲鸞樹杪出行宮
山光積翠遙疑逼水態含青近若空
直視天河垂象外俯窺京室畫圖中
皇情未使息波極日暮樓船更起風

又

武平一

鑾輿羽駕直城隈帳殿旌門此地開
皎潔靈潭圖日月參差畫舫結樓臺
波搖岸影隨橈轉風送荷香入酒來
願奉聖情歡不極長遊雲漢幾昭回

侍宴隆慶池應制

張說

靈池月滿直城隈黼帳天臨御路開
東沼初陽疑吐出南山曉翠若浮來
魚龍百戲紛容與鳧鷖雙舟較泝洄
願似金堤青草馥長承瑤水白雲杯

池以上

○侍宴安樂公主新宅應制 宗楚客

星橋他日構僊榜此時開馬向鋪錢埒
簫聞弄玉臺入同衛叔美容是馬卿
才借問游天漢誰能帶日迴

又

趙彥昭

雲物中京曉天人外館開飛橋像河漢懸榜學蓬萊北
闕臨僊檻南山送壽杯一窺輪奐畢慚慙棟梁材

又

武平一

紫漢秦樓敞黃山魯館開簪裾分上席歌舞列平臺馬
既如龍至人疑學鳳來幸欣聯棣萼何以接鄒枚

侍宴安樂公主山莊應制 李嶠

黃金瑞榜絳河隈白玉僊輿紫禁來碧樹青岑雲外聳
朱樓畫壁水中開龍舟下瞰鮫人室羽節高臨鳳女臺
遽惜歡娛歌吹晚揮戈更却曜靈迴

又

宗楚客

玉樓銀榜枕嚴城翠蓋紅旗列禁庭日映層岩圖畫色
風搖雜樹管絃聲水邊重閣含飛動雲裏孤峯類削成
幸覩八龍遊閨苑無勞萬里訪蓬瀛

又

盧藏用

皇女瑤臺天漢潯星橋月宇構山林飛蘿半拂銀題影
瀑布環流玉砌陰菊浦香隨鸚鵡泛簫樓韻逐鳳凰吟
瑤池駐蹕思方久璧月無文興轉深

又

蕭至忠

西郊窈窕鳳凰臺北渚平明法駕來匝地金聲初度曲

應制詩
卷七
周堂玉溜好傳杯灣路分遊畫舟轉巖間相望碧亭開
微臣此時承宴樂髮髯疑尋星漢迴

又

沈佺期

皇家貴主好神僊別業初開雲漢邊山出盡如鳴鳳嶺
池成不讓飲龍川粧樓翠幌教春住舞閣金鋪借日懸
敬從乘輿來此地稱觴獻壽樂鈞天

又

李適

平陽金榜鳳凰樓沁水銀河鸚鵡洲綵仗遙尋丹壑裏
僊輿暫幸綠亭幽前池錦石蓮花艷後嶺香爐桂蕊秋
貴主稱觴萬年壽還輕漢武濟汾遊

又

李乂

金輿玉輦背三條水閣山樓望九霄野外初迷七聖道
河邊忽覩二靈橋懸流滴滴依虬箭清吹泠泠雜鳳簫
向晚平陽歌舞合前溪更轉玉蘭橈

又

薛稷

主家苑囿極新規帝郊遊豫奉天儀歡宴瑤臺鎬京集
賞賜銅山蜀道移曲閣交映金精板飛花亂下珊瑚枝
借問今朝八龍駕何如昔日望僊池

又

趙彥昭

六龍齊軫御朝曦雙鷁維舟下綠池飛觀仰看雲外聳

浮橋直見海中移靈泉巧鑿天孫渚孝筭能抽帝女枝
幸願一生同草樹年年歲歲樂於斯

又

劉憲

主家別墅帝城隈無勞海上覓蓬萊
香嶂懸流平地起危樓曲閣半天開
庭莎作薦舞行出浦樹相障歌棹迴
此日風光與形勝祗言併伴聖詞來

又

常元旦

銀河南渚帝城隅帝輦平明出九衢
刻鳳蟠螭凌桂邸穿池疊石瀉蓬壺
瓊簫暫下鈞天樂綺綴長懸明月珠
僊榜承恩爭既醉方知朝野更歡娛

又

馬懷素

主家臺沼勝平陽帝幸歡娛樂未央
掩映雕窓交極浦參差繡戶遶迴塘
泉聲百處傳歌曲樹影千重對舞行
聖酒一霑何以報唯忻頌德奉時康

又

岑羲

銀榜重樓出霧開金輿步輦向天來
泉聲迥入吹簫曲山勢遙臨獻壽杯
帝女含笑流飛電乾文動色象昭回
誠願北極拱堯日微臣抃舞咏康哉

又

李迥秀

詰旦重門聞警蹕傳言太主奏山林
是日迴輿羅百騎

此時歡盛賜千金鷺羽鳳簫參樂曲
荻園竹徑接帷陰
手舞足蹈方無極
年年歲歲奉薰琴

侍宴長寧公主東莊應制 李嶠

別業臨青甸
鳴鸞降紫霄
長筵鴛鴦集
僊管鳳凰調
樹接南山近
烟含北渚遙
承恩咸已醉
戀賞未還鑣

又

李適

鳳樓紆睿幸
龍舸暢宸襟
歌舞平陽第
園亭沁水林
山花添聖酒
澗竹繞薰琴
願奉瑤池駕
千春侍德音

又

李义

紫禁乘雷動
青門訪水嬉
上台鱸序集
僊女鳳樓期
合

宴簪紳滿承恩
雨露滋北辰
還捧日東觀
幸逢時

又

鄭愔一本作劉憲

公主林園地
清晨降玉輿
畫橋飛渡水
僊閣漠臨虛
晴新看蛺蝶
夏早摘芙蓉
文酒娛遊盛
忻叨侍從餘

又

崔湜

沁園東郭外
襄一作鑿駕一遊盤
水榭宜時陟
山樓向晚看
席臨天女貴
杯接近臣歡
聖藻懸宸象
徵臣竊仰觀

遊長寧公主林亭應制六首

上官昭容

玉環騰遠構
金埒荷殊榮
弗玩珠璣飾
仍留仁智情
鑿

山便作室憑榭即為楹公輸與班爾從此遂韜聲

其二

登山一長望正遇九春初結駟填街術閭滿邑居關
雲梅先吐驚風柳未舒直愁斜日落不畏酒尊虛術邑中道

其三

霽晚氣清和披襟賞薜蘿玳瑁疑雲色琉璃漾水波跋
石聊長嘯攀松乍短歌除非物外者誰就此經過

其四

暫爾遊山第淹留惜未歸霞窓明月滿澗戶白雲飛書
引藤為架人將薜作衣此真攀桂所臨睨賞光輝

其五

放曠出煙雲蕭條自不群漱流清意府隱几避囂氛石
畫裝苔色風梭織水紋山室何為貴唯餘蘭桂薰

其六

策杖臨霞岫危步下霜溪志逐深山靜途隨曲澗迷漸
覺心神逸俄看雲霧低莫恠人題樹祗為賞幽棲

同公主遊元龍潭

則天武后

山窓遊玉女澗戶對瓊峯巖頂翻雙鳳潭心倒九龍酒
中浮竹葉盃上瀉芙蓉故驗山家賞唯有入風松

奉和初春幸太平公主南莊應制

李嶠

主家山第接雲開
天子春遊動地來
羽騎參差花外轉
電旌搖曳日邊迴
還將石溜調琴曲
更取峯霞入酒杯
鸞輅已辭烏鵲渚
簫聲猶繞鳳凰臺

又

沈佺期

主家山第早春歸
御輦春遊繞翠微
買地鋪金曾作埒
尋河取石舊支機
雲間樹色千花滿
竹裏泉聲百道飛
自有神僊鳴鳳曲
併將歌舞報恩暉

又

宋之問

青門路接鳳凰臺
素澹宸遊寵騎來
澗草自迎香輦合

巖花應待御筵開
文移北斗成天象
酒近一作通南山作

壽杯此日侍臣將
石去共歡明主賜
金廻

又

李乂

平陽館外有僊家
沁水園中好物華
地出東郊迴日御
城臨南斗度雲車
風泉韻遶幽林竹
雨霰光搖雜樹花
已慶時來千億壽
還言日暮九重賒

又

趙彥昭

主第巖高架鵲橋
天門閭闔降鸞鑣
歷亂旌旗轉雲樹
參差臺榭入煙霄
林間花雜平陽舞
谷裏鷲和弄玉簫
已陪沁水追歡日
行奉茅山訪道朝

又

蘇頌

主第山門起灞川宸遊風景入初年
鳳凰樓下交天仗
烏鵲橋邊敞御筵
往往花間逢綵石
時時竹裏見紅泉
今朝扈蹕平陽館
不羨乘槎雲漢邊

又

李邕

傳聞雲漢支機石復見金輿出紫微
織女橋邊烏鵲起
僊人樓上鳳凰飛
流風入座飄歌扇
瀑水當階澣舞衣
今日還同犯牛斗
乘槎共逐海潮歸

又

沁園佳麗奪蓬瀛
翠壁紅泉繞上京
二聖忽從鑾殿幸

雙僊正下鳳樓迎
花含步輦空閒出
樹雜帷宮畫裏成
無路乘槎窺漢渚
徒知訪卜就君平

宴長樂公主宅應制

宋之問

英藩築外館
愛主出王宮
賓至星槎落
僊來月宇空
玳梁翻賀燕
金埒倚晴虹
簫奏秦樓裏
書開魯壁中
短歌能駐日
豔舞欲嬌風
聞有淹留處
山河滿桂叢

宴安樂公主新宅

盧藏用

侯家主第一
時新上席華
年不惜春珠
缸綴日那知
夜玉輦流霞
畏極晨

又

李適

銀河坐倚鳳凰臺玉酒相傳鸚鵡杯若見君平須借問
僊槎一去幾時來

又

李又

牽牛南渡象昭回學鳳樓成帝女來平旦鸚鵡歌席上
一作歌方歡宵一作鸚鵡獻酬杯

又

薛稷

秦樓宴喜月徘徊效筵銀燭滿庭開坐中香氣排花出
扇後歌聲泛酒來

又

劉憲

層軒洞戶旦新披度曲飛觴夜不疲綺綴玲瓏河色曉

珠簾隱映月華窺

又

徐彥伯

鳳樓開闔引明光花耐連添醉益香欲知帝女薰天貴
金歌玉柱夜成行

又

常元旦

主第新成銀作榜賓筵廣宴玉為樓壺觴既卜僊人夜
歌舞疑停織女秋

又

馬懷素

鳳樓窗窳凌三襲翠幌玲瓏瞰九衢復道中宵留宴賞
彌令上客想踟躕

又

金榜重樓開夜扉瓊筵愛客未言歸
銜歡不覺銀河曙盡醉那知玉露晞

岑羲

又

金榜岩堯雲裏開玉簫參差天際迴
莫驚側弁還歸路祇為平陽歌舞催

李迥秀

又

車如流水馬如龍僊史高樓十二重
天上初移漢匹嬪可憐歌舞夜相從

蘇頲

又

閻朝隱

鳳凰鳴舞樂昌年蠟燭開花夜管絃
半醉徐擊珊瑚樹已聞鍾漏曉聲傳

又

崔日用

銀燭金屏坐碧堂只言河漢動神光
主家盛明歡不極才子能歌夜未央

又

武平一

王孫帝女下僊臺金榜珠簾入夜開
遽惜瓊筵歡正洽唯愁銀箭曉相催

晦日承恩讌永穆公主亭子賦得流字

張說

堂邑山林美朝息晦日遊園林含淑氣竹樹遶春流舞
席千花妓歌船五綵樓群歡與王澤歲歲滿皇州

林亭

以上
公王

苑詩類選卷之七終



